

Frieher was onnaschd


Die Mensche sinn dieselwe, ob groß odda klään.
Nur die Erziehung war domols onnaschd gewähn.
Do isses no de Relischione gong.
Es Schulhaus unn de Schulhof ware streng getrennd,
rechts sinn die Kaddolische, links die Prodeschdande gerennd.
Do war de Schdreid jo schunn vorprogrammierd.
Das hat oft zu Krach unn Krawall gefiehart.
Mir honn geruf: "Kaddolische Zuggerpäns!"
Mir Evangelische ware die „Raddeschwänz“.
Mit Kreid honn mir – das is nit geloh –
in da Mitt vumm Schulhof e Schdrisch gezoh.
Die Lehringe honn sisch nit drohn gesteeert,
die honn nit geguggt unn nix geheert.
Die ware sisch doch selwer nit grien;
die sinn schpaziert – die ääne här, die onnere hin,
bis om Enn vunn da Paus es hat geschelld.
Mir honn uns donn brav zwei unn zwei uffgeschdelld.

Jed Lehring hat e Schpitznome gehadd;
Odda mir honn – unner uns – de Vornome gesaht.
Ääni war drunner – aarisch fromm, awwer schdrenge -,
bei der hat´s glei abgesetzt – peng, peng, peng.
Ihr Vornome, Elisabeth, hat uns so gudd gefall;
Vunn do ohn war´s es Lissje iwwa-all.
Die hat Uffsischd gehadd onn sellem Dah,
wie uffem Schulhof de große Ballawer war.
Kenner hat nohär gewisst, wieso, warum.
Es is halt ääns zum onnere kumm.
Mir honn gezonkt, uns vaschull unn vaschpodd,
Worde sinn gefall, die Gott vabodd.
Mir honn ohngefong in die Hoor uns ze krien.
Das kunde die Uffpasser nimmeh iwwasiehn.
Uff äämol hat doch so e Schussel laud geruf:
„Es Wewer Lissje kummd, heere endlich uff!“
Unn die hat das geheert! Oh, war das schlimm!
Reschelreschd iwwaschlah hat sisch der ihr Schdimm:
„Wer war das? Die melde sich sofort bei mir!
Sonst werden alle bestraft dafür.“
Gepetzt honn mir nit, das war doch klar.
Mir honn jo aach nit gewisst, wer´s tatsäschlich war.
Jetzt honn die Lehringe mitenonner dischkudiert,
honn erschde Geschpräsche iwwa „diese Jugend“ gefiehart.
Mir honn´s geohnd: Ebbes Guddes bedeid das nit.
Die Klasse 4 honnse rechts unn links all uff die Fingere kritt.
Middem Rohrschdegge rechts unn links uff die Hänn –
Das war villeischd Pein unn Weh gewähn.
Awwer wie hädd ma sisch als Kind solle degeje wehre?
Das Geschrei hädde ihr mol misse heere!

Mit vabrillde Aue sinn mir hemmgeschlisch.
De gonze Hemmwäh honn mir noch gekrisch.

Awwer ebbes honn mir aus der do Sach gelehrt:
Fa onnere die Poode hinhalle is immer vakehrt!
Schpäder honn mir mit weißer Kreid
E Quärschdrisch gezoh vunn Seit zu Seit.
Honn Völlgerball mitenonner drainierd.
Unn seid der Zeit is so ebbes nimmeh passiert.


Helene Keller



Mühlenschule



Kirchenschule



Schule am Neuhauserweg